

No Servus, Diener und Habe die Ehre!

Etze kummt dos

Nej su wos

vu Sömde, n 31. Dezember 2022



O. Michael Siegmund

Gedankn zun Juhresende

Etze gieht alsdann dos döchtsche Juh 2022 zu Ende. Ville warn sohn, dossed kej gudes Juh gewast ös. Drbeine kons jo amende gor nösch drfier, dossed su gehejssn word, denn s kimmt ömmer uf de Menschn o, wos die aus su enn Juhre machn. Wenn de Leute mit enn Juhre gutt ömgiehn, wörds o Silvester geloubt, hon se obr vill tummes Zeug gemacht, muß es dos orme Juhre ausbodn, wird zu senn Obgange a schlaichtes Juhre genannt und mit Schimpf und Schande drvoune gejoht. Jo, und su ejs wor dos orme Juhre 2022.

Ogefangn hottes noch mit dr Coronapandemie, drnouern kom dr lebrfoll vun Russn uf de Ukraine, wos bei uns ei Folge zur Energiekrise und zu enner Inflatoun gefiehrht hout. Dou hon sich zun Beispiele de Strompreise fost vrvierfacht und ou s Gas und s Ele sein elend teuer gewurn. Su hottn de Leute uf ejmoul vill wingr Gald ei dr Tosche und dr sugenannte Konsumklimaindex ging euch geliche uf Tolfohrht.

Kej Wunder, wenn etze olle iebr dos Juhre 2022 harziehn und doss uf ejmoul ganz bestömmte Gruppierungen Zulauf kriegen, weil se a Sommlbeckn fr Enttäuschte und Obgehängte sein – zun Beispiele de sugenanntn „Reichsbirger“ und de „Letzte Generatioun“.

De Reichsbirger tun jo de Bundesrepublik ne ols Staat anerkenn und sohn, doss es sich öm ane GmbH handelt, weil de Deutchn ols Erwachsene enn Personalausweis kriegen und danzufolge bei dr Firma Deutschland beschäftigt sein. Ich weiß ock ne, wos fr a Reich de Reichsbirger zoricke honn wolln. Össes dos dritte Reich vu Adolfn oder dos ale Deutsche Kaiserreich? Mr weißes ne genau. Obr uf dr enn Seite de Segnungn vun Rechtsstaate genissn wolln und n uf dr andern Seite gleichzeitsch bekämpfn, dos ös arnewie ne logisch.

De „Letzte Generatioun“ tut sich frn Klimaschutz eisatzn, wos jo einklich ane gude Sache ös. Obr dorch de Mittl, die se owendn, um uf ihre Sache ufmerksam zu machen, tun se ihrn Oliegenn kenn Gefolln. Mrscheints, doss die vu Uhu und Pattex gesponsert warn, weil se sich ömmer wieder uf Stroussn, Landbahnen oder ou o Kunstwarkn festpoppn und de Polizei Probleme hout, de Leute wieder luszueisn. Bei aner Kunstausstellung, wu de Böldr drzune mit Tomatnsousse und Arepplmauke beschmiert wurn, hout dr Gallerist aus dr Nut ane Tugnd gemacht. A hout de Preise vu dan benözttn Labnsmöttln ufn Vrkaufspreis vu dan Böldrnf ufgeschloun, su doss a Wark, wos 50 € gekost hotte, uf ejmoul mit 52,98 € zun Vrkaufe stond und a andres fr 171,85 €.

lebrigens ho ich gefroit, ob ich amende ou bei dr „Letztn Generatioun“ mitmachn dörfte, weil jo dr Drhalt vu dr Walt a vurdringliches Oliegenn ös. Dou hon die gesoht, doss ich ols Mitglied ne ei Frouge kumme, weil ich schun Kinder und Enkl ho und dasdrholbn jo ne de letzte Generatioun ei maner Familie bie.

Obr die dötte Oblehnung kon ich schun arnewie vrkroftn. Dou tu ich halt an nächstn Juhre ei menn ejgnen Ömfelde wosn fr de Ömwalt machn. Dos ös amende ou a klenner Schriet ei de röchtsche Richtung öm de Walt zu rettn. Mejntr ne ou ?
